



REPUBLIKA E KOSOVES-REPUBLIKA KOSOVA-REPUBLIC OF KOSOVO
KËSHILLI PAVARUR MBIKËQYRËS PËR SHËRBIMIN CIVIL TË KOSOVËS
NEZAVISNI NADZORNI ODBOR CIVILNE SLUŽBEKOSOVA
INDEPENDENT OVERSIGHT BOARD CIVIL SERVICE OF KOSOVO

Pranuar / Dorezuar Prijemeno/Pridato Received/Delivered	09.09.2022	2	viti god year
Organ /Njësia Organ /Jedinica Org /Unit	Nr Prot Br Prot Prot No	Shtypja Printog Appendix	Sasia Kolicina Quantity
SKDMBAK	5297/2022		114



Republika e Kosovës
Republika Kosova - Republic of Kosovo

KËSHILLI I PAVARUR MBIKËQYRËS PËR SHËRBIMIN CIVIL TË KOSOVËS
NEZAVISNI NADZORNI ODBOR CIVILNE SLUŽBEKOSOVA
INDEPENDENT OVERSIGHT BOARD FOR THE CIVIL SERVICE OF KOSOVO

A.nr.675/2022

Këshilli i Pavarur Mbikëqyrës për Shërbimin Civil të Kosovës-Kolegji për Shqyrtimin dhe Vendosjen e Ankesave në përbërje nga: Ardita Haxhnikaj-Demi-kryetare, Arben Mehmeti dhe Jeton Koca-anëtarë, me Ilire Mehmeti Shaqiri-Zyrtare e Lartë për Bashkëpunim Profesional në cilësinë e procesmbajtëses, ka shqyrtuar ankesën me numër A.nr.675/2022 të datës 29.07.2022 të parashtruar nga ankuesi kundër organit të punësimit Shërbimit Korrektues të Kosovës, në çështjen juridike-administrative "kërkesë nga marrëdhënia e punës", duke vepruar në pajtim me nenin 6 paragrafin 1 nënparagrafin 1.1, nenin 16 paragrafi 3 dhe nenin 18 paragrafin 1 nënparagrafin 1.2 të Ligjit Nr.06/L-048 për Këshillin e Pavarur Mbikëqyrës për Shërbimin Civil të Kosovës, në seancën për këshillim dhe votim të mbajtur më datë 09.09.2022, mori këtë:

V E N D I M

- I. Apropohet si e bazuar** ankesa A.nr.675/2022 e datës 29.07.2022 e parashtruar nga ankuesi
- II. Obligohet** Menaxheri i Burimeve Njerëzore të Shërbimit Korrektues të Kosovës që brenda afatit prej pesëmbëdhjetë (15) ditësh nga dita e pranimit të këtij vendimi, të ndërmarr të gjitha veprimet e nevojshme ligjore për rregullimin e statusit të ankuesit në pajtim me dispozitat e Ligjit për Zyrtarët Publikë.
- III. Obligohet** Drejtori i Përgjithshëm i Shërbimit Korrektues të Kosovës që të siguroj zbatimin e vendimit ashtu siç është përcaktuar në pikën II të dispozitivit.
- IV. Këshilli i Pavarur Mbikëqyrës për Shërbimin Civil të Kosovës** duhet të njoftohet me shkrim pas ndërmarrjes së veprimeve në pajtim me këtë vendim.

A r s y e t i m

Ankuesi i punësuar në Shërbimin Korrektues të Kosovës më datë 29.07.2022 ka parashtruar ankesë në Këshillin e Pavarur Mbikëqyrës për Shërbimin Civil të Kosovës kundër përgjigjes me numër protokoll 850 të datës 25.07.2022 të Zëvendësuesit të Drejtorit të Përgjithshëm të Shërbimit Korrektues të Kosovës, për shkak të moszbatimit të dispozitave të Ligjit Nr.06/L-114 për Zyrtarët Publikë.



Këshilli i Pavarur Mbikëqyrës për Shërbimin Civil të Kosovës bazuar në dispozitat e Rregullores Nr.02/2018 për Procedurën e Shqyrtimit dhe Vendosjes së Ankesave në Këshillin e Pavarur Mbikëqyrës për Shërbimin Civil të Kosovës, më datë 08.08.2022 ka proceduar kërkesën për përgjigje në ankesë të ankueset të Shërbimi Korrektues i Kosovës, ndërsa ky i fundit më datë 16.08.2022 ka dorëzuar shkresat lidhur me çështjen ankimore.

Kolegji për Shqyrtimin dhe Vendosjen e Ankesave, me qëllim të vendosjes meritorë ka administruar këto prova: Ankesën me numër protokollit 4407/2022 të datës 29.07.2022 të parashtruar nga ankuesi në Këshillin e Pavarur Mbikëqyrës për Shërbimin Civil të Kosovës; Kontratën e punës të datës 30.03.2016 për kohë të pacaktuar; Kontratën e punës të datës 02.02.2018; Vlerësimin e rezultateve në punë të datës 30.12.2020; Vlerësimin e rezultateve në punë të datës 26.01.2022; Vërtetimin me numër 28 të datës 07.02.2022; Kërkesën me numër të 850 të datës 25.07.2022 për shndërrimin e marrëdhënies së punës në kohë të pacaktuar; Përgjigjen në kërkesë me numër të protokollit 850 të datës 25.07.2022; Kërkesën për përgjigje në ankesë me numër të protokollit 4586/2022 të datës 08.08.2022; Përgjigjen në ankesë me numër të protokollit 4760/2022 të datës 16.08.2022; Vlerësimin e rezultateve në punë të datës 13.12.2019; Dokumentin e identifikimit të ankuesit; Emalin e datës 16.08.2022 nga për KPMSHCK; e-malin e datës 23.03.2022 me numër të protokollit 1531/2022 fq. ½, e-malin e datës 22.03.202 me numër protokollit 1519/2022, Njoftimin e datës 16.06.2021 mbi deklarimin e statusit të zyrtareve të Shërbimit Korrektues të Kosovës, Konkursin me numër reference RN00008559 i datës 15.03.2022; dhe Konkursin me numër reference RN00008066 i datës 07.02.2022.

Kolegji për Shqyrtimin dhe Vendosjen e Ankesave bazuar në vlerësimin e hollësishëm të çdo prove veç e veç dhe të gjitha provave të marra së bashku, si dhe bazuar në rezultatin tërësor të shqyrtimit administrativ, konstatoi së është e bazuar ankesa e ankuesit, *sepse*:

Nga administrimi i provave materiale të lëndës rrjedhë se ankuesi në bazë të Ligjit Nr.04/L-149 për Ekzekutimin e Sanksioneve Penale dhe Ligjit Nr.03/L-212 të Punës, fillimisht më datë 30.03.2016 përmes Kontratës së Punës për kohë të caktuar ka themeluar marrëdhënie të punës me Shërbimin Korrektues të Kosovës në pozitën e punës "Zëvendës drejtor i Qendrës së Paraburgimit në Pejë" për periudhën nga data 30.03.2016 deri më datë 29.03.2018, ndërsa sipas Kontratës së Punës për kohë të caktuar të datës 07.02.2018, ankuesit i është vazhduar marrëdhënia e punës në pozitë të njëjtë me kohezigjatje nga data 30.03.2018 deri më datë 29.03.2023.

Ankuesi më datë 25.07.2022 ka parashtruar kërkesë me numër protokollit 850 të Menaxheri i Personelit të Shërbimit Korrektues të Kosovës, për shndërrimin e kontratës së punës në akt emërim të përhershëm duke u bazuar në nenin 32 paragrafi 2 të Ligjit Nr.06/L-114 për Zyrtaret Publikë, ndërsa në përgjigje të kërkesës së ankuesit Zëvendësuesi i Drejtorit të Përgjithshëm i Shërbimit Korrektues të Kosovës, përmes shkresës me numër protokollit 850 të datës 25.07.2022 ka refuzuar kërkesën e ankuesit, me arsyetimin se ankuesi ka themeluar marrëdhënie të punës në bazë të dispozitave të Ligjit për Ekzekutimin e Sanksioneve Penale me afat të caktuar, andaj edhe kontrata e punës me afat nuk mund të kthehet me afat të pa caktuar. Ankuesi i pakënaqur me këtë përgjigje, brenda afatit ligjor parashtron ankesë në Këshillin e Pavarur Mbikëqyrës për Shërbimin Civil të Kosovës për shkak të moszbatimit të



dispozitave të Ligjit Nr.06/L-114 për Zyrtares Publikë nga organi i punësimit, duke shtuar me tej se mos rregullimi i marrëdhënies së punës respektivisht mos shndërrimi i kontratës së punës me afat të caktuar në akt emërim të përhershme është në kundërshtim me nenin 32 paragrafi 2 të Ligjit Nr.06/L-114 për Zyrtares Publikë. Propozon që Këshilli ta aprovoj ankesën si të bazuar dhe të obligoj Shërbimin Korrektues të Kosovës që ankueset t'i rregulloj marrëdhënien e punës me akt emërim me afat të pacaktuar.

Kolegji i Këshillit, lidhur me shqyrtimin e ligjshmërisë së pretendimeve ankimore të ankuesit ka analizuar bazën ligjore mbi të cilën janë ngrit pretendimet ankimore, gjegjësisht dispozitat e Ligjit Nr.06/L-114 për Zyrtares Publikë, ku me nenin 4 paragrafi 1 është përcaktuar se: *Nëpunësit profesional të shërbimit diplomatik dhe shërbimi korrektues janë nëpunës civilë me status të veçantë, të cilët rregullohen me këtë ligj dhe me ligj të veçantë*, dhe si rrjedhojë konstatoi se me hyrjen në fuqi të këtij ligji, nëpunësit e shërbimit korrektues kanë statusin e nëpunësve civilë me status të veçantë duke nënkuptuar se marrëdhënia e tyre e punës rregullohet me dispozitat e Ligjit për Zyrtares Publikë, dhe ligjit të veçantë. Në vlerësimin e Kolegjit të Këshillit rregullimi me ligj të veçantë i elementeve nga marrëdhënia e punës duhet të jetë në pajtueshmëri me parimet e përcaktuara me Ligjin për Zyrtares Pblikë dhe mund të rregullohen ndryshe vetëm këto elemente të marrëdhënies së punës: kushtet e veçanta apo shtesë për rekrutim; të drejtat ose detyrimet specifike; rregullat e veçanta për zhvillimin e karrierës sipas sistemit të gradave; zhvillimi profesional dhe nevojat për trajnime; transferimin dhe sistematizimin e nëpunësve.

Ndërsa, përkitazi me rregullimin e statusit të zyrtarëve publikë, Kolegji i Këshillit ka analizuar dispozitat tranzitore të Ligjit Nr.06/L-114 për Zyrtares Publikë, përkatësisht Nenin 83 paragrafi 2 ku përcaktohet se: *Një punonjës aktual, që nuk e ka statusin e nëpunësit civil sipas Ligjit të Shërbimit Civil (03/L-149), por që e mban një pozitë, e cila është pozitë e Shërbimit Civil për nga funksionet dhe përgjegjësitë sipas nenit 2, paragrafit 3 të këtij ligji, do të emërohet si nëpunës civil sipas këtij ligji, nëse i plotëson këto kushte: 2.1. ka qenë në marrëdhënie pune në një institucion të administratës shtetërore apo në një institucion tjetër shtetëror së paku dy vjetët e fundit para hyrjes në fuqi të këtij ligji; 2.2. i plotëson kërkesat e nenit 8 të këtij ligji, dhe 2.3. është vlerësuar për rezultatet në punë në këto dy vjet të paktën "mirë", dhe paragrafin 16 po të të njëjtit nen ku përcaktohet se: *Deklarimi apo rregullimi i statusit të punësimit të çdo personi, sipas paragrafëve 1- 8 të këtij neni, bëhet me propozim të institucionit dhe me miratimin e Njësisë përgjegjëse, brenda 2 muajve nga hyrja ne fuqi e këtij ligji. Procedura e deklarimit/rregullimit zhvillohet sipas Ligjit për Procedurën Administrative.**

Andaj, në kuptim të këtyre dispozitave ligjore, si dhe duke ju referuar nenit 8 të po të njëjtit ligj, Kolegji i Këshillit konstaton se në rastin konkret janë plotësuar kushtet ligjore për rregullimin e statusit të zyrtarit publikë për ankuesin, për faktin se ashtu siç është konstatuar me lartë i njëjti është në marrëdhënie të punës në Shërbimin Korrektues të Kosovës, nga data 30.03.2016, dhe rrjedhimisht sipas shkresave të lëndës ankuesi është vlerësuar për vitin 2020 me notë të përgjithshme 4, kurse për vitin 2021 me notë të përgjithshme 3.44, duke u vlerësuar kështu dy (2) vite radhazi me notë "shumë mirë", dhe se nuk ka dëshmi së ankuesi ka në fuqi masë disiplinore "largim nga një pozitë e zyrtarit publik" apo së i njëjti është dënuar me vendim të formës së prerë për kryerjen e një vepre penale me dashje.

Kështu që pas analizimit dhe vlerësimit të të gjitha shkresave të lëndës si dhe duke u bazuar nën 6 paragrafi 1 nën paragrafi 1.1 dhe nën 18 paragrafi 1 nën paragrafi 1.2 të Ligjit Nr.06/L-048 për Këshillin e Pavarur Mbiqyrës për Shërbimin Civil të Kosovës, Kolegji i Këshillit vendosi në dispozitiv të këtij Vendimi.

Vendimi hyn në fuqi në ditën e nënshkrimit nga Kryetarja e Kolegjit

Këshillë juridike:

Kundër vendimit të Këshillit, pala e pakënaqur e cila pretendon se vendimi i Këshillit nuk është i ligjshëm mund të iniciojë konflikt administrativ në Gjykatën Themelore në Prishtinë-Departamenti për Çështje Administrative, brenda afatit prej tridhjetë (30) ditësh nga dita në të cilën i është dorëzuar vendimi. Inicimi i konfliktit administrativ nuk e ndalin ekzekutimin e këtij vendimi.

KËSHILLI I PAVARUR MBIKËQYRËS PËR SHËRBIMIN CIVIL TË KOSOVËS
Lënda me numër A.nr.675/2022

Ilire Mehmeti-Shaqiri


Procesmbajtëse

Ardita Haxhnikaj-Demi


Kryetare e Kolegjit



Vendimi i dërgohet:

- Ankuesit
- Drejtorit të Përgjithshëm në Shërbimin Korrektues të Kosovës;
- Udhëheqësit të Burimeve Njerëzore në Shërbimin Korrektues të Kosovës dhe
- Arkivit të KPMSHCK-së.

